

# Kompanija optužuje vladu za nezakonito djelovanje

Jedna od osam kompanija koje su se prijavile na tender za privatizaciju Aluminijskog zavoda d.d. Mostar podnijela je krivičnu prijavu protiv članova tenderske komisije. Konzorcij kojega predvodi UKIO Bank Investment Group (UBIG) iz Litvanije navodi da je komisija zloupotrijebila položaj svjesno djelujući u pravcu protupravnog pogodovanja pojedinih ponuđača i eliminaciji UBIG-a koji je dostavio najbolju ponudu. Prethodno su kazali da ih je komisija uskratila za mogućnost žalbe, te im nije dostavila obrazloženje odluke o njihovoj eliminaciji. Ova kompanija nije prošla u drugi tenderski krug, a komisija je odbila da javnosti dostavi zvaničnu listu bodovanja kompanija.

Aluminij u ukupnom izvozu Bosne i Hercegovine (BiH) učestvuje sa oko 10 posto. Istražujući proces privatizacije Aluminijskog zavoda, novinari Centra za istraživačko novinarstvo (CIN) iz Sarajeva su otkrili da postupci predstavnika vlasti nisu bili transparentni, te da je primijenjen neuobičajen oblik privatizacije, kakav zakon u BiH ne poznaje. Izabrana procedura naišla je na kritiku predstavnika Svjetske banke i drugih stručnjaka za tendere.